

**PEMBERITAHUAN PERTANYAAN LISAN**  
**DEWAN RAKYAT MESYUARAT KEDUA, PENGGAL KELIMA**  
**PARLIMEN YANG KE-13**

**PERTANYAAN : LISAN**

**DARIPADA : DATO' DR. MUJAHID BIN YUSOF RAWA  
(PARIT BUNTAR)**

**TARIKH : 7 OGOS 2017**

**NO. SOALAN : 87**

**SOALAN : Minta Perdana Menteri menyatakan apakah tindakan Kerajaan membendung fahaman sempit agama yang menimbulkan kebencian antara kaum dan berbagai agama di negara ini.**

**JAWAPAN :**

**Tuan Yang Di Pertua,**

Malaysia adalah sebuah negara yang mempunyai rakyat yang berbilang kaum, agama dan budaya yang mana perpaduan merupakan agenda utama yang perlu terus diperkukuhkan. Tidak dinafikan bahawa perbezaan pandangan dari segi etnik, agama dan budaya serta bahasa boleh mencetuskan prasangka, perselisihan dan persengketaan. Oleh kerana perbezaan anutan agama, maka isu-isu agama cenderung menjadi sensitif dan mencetuskan perasaan serta sentimen perkauman yang kuat.

Bagi meningkatkan persefahaman dan keharmonian serta membendung fahaman sempit agama dalam kalangan penganut-penganut pelbagai agama di negara ini, Kerajaan melalui Jabatan Perpaduan Negara dan Integrasi Nasional (JPNIN) telah melaksanakan pelbagai langkah seperti berikut :

- 1) **Menubuhkan Jawatankuasa Mempromosikan Persefahaman dan Keharmonian Antara Penganut Agama (JKMPKA)** yang menunjukkan keikhlasan kerajaan dalam usaha ke arah mempromosikan keharmonian dan persefahaman antara rakyat Malaysia yang terdiri dari penganut pelbagai agama memandangkan agama mudah dimanupulasikan sehingga menjadi isu sensitif dan membawa kepada konflik antara kaum. Justeru, JKMPKA diwujudkan bagi meningkatkan kefahaman terhadap pelbagai agama, membincangkan isu-isu yang boleh menggugat keharmonian agama dan ketenteraman masyarakat, menyelesaikan sengketa dan menyebarkan mesej-mesej keharmonian. JKMPKA juga mencadangkan dasar-dasar kerajaan yang berteraskan nilai agama serta melaksanakan aktiviti kemasyarakatan bersama-sama pihak kerajaan.
  
- 2) Satu **Pelan Strategik** telah digubal oleh JKMPKA yang menggariskan mengenai **pengurusan isu dan penganjuran program** yang merangkumi pelbagai kaedah pelaksanaan seperti dialog, forum, seminar, bengkel, kem serta sambutan hari kebesaran pelbagai agama melibatkan penyertaan pelbagai kaum dan agama.

- 3) **Badan-badan bukan kerajaan (NGOs) dan pemimpin-pemimpin agama melalui platform JKMPKA juga mengambil inisiatif sendiri untuk menganjurkan dan menyertai pelbagai forum, sesi perbincangan, dialog keagamaan dan kegiatan bersama atas galakan dan bantuan JPNIN.** Pada tahun 2016, JKMPKA dengan kerjasama JPNIN dan pelbagai badan bukan kerajaan (NGOs) serta lain-lain agensi kerajaan telah melaksanakan 18 program dengan melibatkan seramai 8,200 orang masyarakat pelbagai agama dan kaum di Malaysia.
  
- 4) JPNIN dengan kerjasama JKMPKA juga telah menganjurkan **program di peringkat Kebangsaan seperti Sambutan Minggu Keharmonian antara Penganut Agama Sedunia (*World Interfaith Harmony Week – WIHW*) dan Hari Toleransi Sedunia (*International Day for Tolerance*)** di mana kedua-dua sambutan ini telah diisytiharkan oleh Pertubuhan Badan-Badan Bersatu (PBB) bagi menggalakkan persefahaman dan dialog antara agama serta memupuk dan mendidik masyarakat umum ke arah toleransi, keharmonian dan keamanan sejagat.
  
- 5) Penganjuran program-program ini menunjukkan bahawa:
  - i) Agama bukanlah penghalang dalam usaha mewujudkan kesepaduan sosial dalam kalangan masyarakat Malaysia pelbagai kaum dan agama.
  - ii) Ianya juga memupuk kesedaran dan meningkatkan penghayatan Prinsip Pertama Rukun Negara iaitu

“Kepercayaan Kepada Tuhan” yang menjadi panduan dan pedoman hidup bermasyarakat pelbagai kaum dan agama di Malaysia. Prinsip ini menekankan kepada pegangan terhadap nilai-nilai murni dalam ajaran agama masing-masing dan seterusnya mencorak kehidupan yang harmoni dan sejahtera.

- iii) Penyertaan peserta pelbagai kaum dan agama dalam program-program ini telah menyuburkan lagi perasaan muhibah dan mengembangkan sikap serta menolak sebarang sikap ekstrem yang cenderung terhadap penghinaan kepada agama lain.
6. Pembangunan Pelan Strategik Wasatiyyah 2016 – 2020 juga merupakan satu anjakan paradigma ke arah budaya kerja yang lebih positif yang telah meletakkan **Pendekatan Wasatiyyah** sebagai dasar negara yang akan dipraktikkan dalam setiap faktor pentadbiran negara supaya dapat menyemai sikap kesederhanaan dan membendung fahaman sempit agama serta menjauhi dari kegiatan ekstremisme.

Namun, usaha Kerajaan sahaja tidak mencukupi malah semua pemimpin politik dan masyarakat harus berusaha supaya mengelakkan kecenderungan untuk mempolitik dan mempolarisasikan isu-isu berkaitan agama dan etnik yang mana ianya boleh menimbulkan kebencian antara kaum dan penganut pelbagai agama di negara ini. Kesanggupan kerajaan yang bersedia mengambil tindakan tegas terhadap mereka yang menjejaskan kesensitifan dan keamanan negara ini membuktikan bahawa kerajaan benar-benar serius dalam membendung sebarang prejudis dan

sikap *ethnocentrism* dalam kalangan pelbagai lapisan masyarakat Malaysia.

Sekian, terima kasih.

Disediakan oleh

Bahagian Hal Ehwal Agama  
Jabatan Perpaduan Negara dan Integrasi Nasional  
Jabatan Perdana Menteri